

**Ukiumut aningaasaqarfiusumut 2013-imut ilassutitut aningaasaliissutissanut inatsisissatut siunnersuut**

(Aningaasaqarnermut Nunamullu Namminermut Naalakkersuisoq)

**Saqqummiussinermut allakkiaq**

(Aningaasaqarnermut Nunamullu Namminermut Naalakkersuisoq)

**Siullermeerneqarnera**

Naalakkersuisut sinnerlugit matumuuna 2013-imut ilassutitut aningaasaliissutitut inatsisissatut siunnersuut saqqummiuppara. Missingersuutitut inatsimmi § 26-imi allaqqavoq aningaasaliissutit nutaat allannguutilluunniit aamma allangartaliussat ukiumi aningaasaliiffiusumi ilassutitut aningaasaliissutitut inatsimmut ilanngunneqassasut ukiup tulliani saqqummiunneqartussami.

2013-mut ilassutitut aningaasaliissutitut inatsisissatut siunnersuut taamaalilluni kingumoortumik aningaasaliinertut isigisariaqarpoq. Aalajangiinerit 2013-ip ingerlanerani aningaasaliissutitut allannguutissat pillugit Naalakkersuisut kiisalu Inatsisartut Aningaasaqarnermut Akileraartarnermullu Ataatsimiititaliaata aalajangiiffigisimasaat ilassutitut aningaasaliissutitut inatsimmi aqqissuunneqarput.

2013-imut ilassutitut aningaasaliissutitut inatsisissatut siunnersuut ilanngussaq 1-imi ilaqarpoq, tassani aningaasaliissutit 2013-imi akuersissutigineqartut takutinneqarlutik aamma ilanngussaq 2, aamma 2013-imi oqaasertaliussanik allannguutit akuersissutigineqartut takuneqarsinnaallutik.

2013-imut Aningaasanut inatsit aamma 2013-imut ilassutitut aningaasaliissutitut inatsisissatut siunnersuut ukiumut 2013-imut aningaasaliiffimmut ataatsimut aningaasaliissutitut tunngapput. Taamaalillutik Nunatta Karsianut 2013-imut naatsorsuutitut aallaaviupput, taakkulu Inatsisartut ataatsimiinnerminni uani suliarisussaavaat.

2013-mut aningaasanut inatsit missingersuutaasutut IST-mi 113,6 mio. kr.-inik amigartooruteqarfiuvoq. Inatsisartut Aningaasaqarnermut Akileraartarnermullu ataatsimiititaliaata 2013-ip ingerlanerani ilassutitut aningaasaliissutit akueraat, taamaalillunilu IST-mi missingiunneqartut amingartoorutit 10,3 mio. kr.-inik ikilisinneqarlutik. Taamaalilluni Inatsisartut ilassutitut aningaasaliissutitut inatsisissaattut siunnersuuttip ukiumi aningaasanut inatsiseqarfiusumi 2013-imi IST-mi 103,3 mio. kr.-inik amigartooruteqarnissamik missingersuuteqarnermik nassaqarpoq.

Taamatut oqaaseqarlunga Naalakkersuisut 2013-mut ilassutitut aningaasaliissutitut inatsimmut siunnersuut Inatsisartunut suliasanngortippara.

